

19 DEC 1997

IJN-Jantung

PEMINDAHAN JANTUNG YANG PERTAMA DI MALAYSIA SEMALAM

KUALA LUMPUR, 19 Dis (Bernama) -- Institut Jantung Negara (IJN) mencatatkan sejarah apabila berjaya menjalankan pemindahan jantung yang pertama di Malaysia terhadap seorang pesakit lelaki berusia 51 tahun di sini, semalam.

Penerima jantung itu merupakan seorang juruteknik yang disahkan sebagai menghidap "penyakit jantung peringkat serius" dan berada dalam senarai menunggu pemindahan jantung sejak tujuh bulan lepas, menurut hospital itu hari ini.

Butir-butir mengenai penderma itu tidak didedahkan.

Pembedahan empat jam itu dari pukul 4 petang hingga 8 malam dijalankan oleh sepasukan 17 doktor yang diketuai oleh Ketua Pakar Pembedahan Kardiorasik IJN Datuk Dr Yahya Awang.

"Kita gembira untuk mengumumkan yang pesakit itu menunjukkan kemajuan dan mengikut ramalan kami. Pesakit itu kini diawasi di Unit Rawatan Rapi," kata Dr Yahya kepada pemberita.

Pasukan doktor itu terdiri daripada tiga pakar bedah, tiga pakar bius, empat pakar jantung dan bakinya kakitangan sokongan.

"Kita telah membuat persiapan untuk pembedahan ini sejak dua tahun lepas dan kita gembira semuanya berjalan lancar seperti yang dijangkakan," kata Dr Yahya yang juga merupakan pakar bedah yang menjalankan pembedahan pintasan jantung pada Perdana Menteri Datuk Seri Dr Mahathir Mohamed pada 1989.

Beliau berkata, pesakit itu dalam keadaan baik dan telah sedar diri serta bernafas sendiri tetapi masih ditempatkan di unit rawatan rapi.

"Beliau masih dalam pengawasan rapi dan akan terus berada di unit itu untuk beberapa hari lagi," kata beliau.

Ditanya sama ada timbul sebarang kesukaran semasa pembedahan itu, Dr Yahya berkata: "Tiada masalah besar dan semuanya berjalan seperti yang dijangka dan kita berpuas hati."

Sementara itu Pakar Runding Kardiorasik IJN Datuk Dr Ahmad Sallehuddin berkata, institut itu memulakan persediaan bagi pembedahan itu selepas dimaklumkan mengenai penderma itu oleh sebuah hospital di sini pada pukul 10 pagi semalam.

Penerima itu dipilih daripada empat penderma dalam senarai menunggu. Penerima itu dipilih atas kriteria kumpulan darah dan saiz badannya.

Dr Ahmad berkata pada 3.30 petang, sepasukan doktor dan jururawat dari IJN pergi ke hospital itu untuk mengeluarkan jantung penderma yang turut menderma kedua-dua buah pinggangnya.

Jantung itu dibawa balik ke IJN dan dipindahkan kepada penerima.

Dr Yahya berkata, kemudahan yang digunakan adalah sama seperti yang digunakan dalam prosedur pembedahan jantung terbuka kecuali tambahan dalam pengawasan, dadah dan peralatan.

Beliau berkata, sebelum ini IJN telah menjalankan kerja-kerja eksperimen dan menjalankan pemindahan jantung pada 11 kambing biri-biri dengan kerjasama Universiti Putra Malaysia (UPM).

Mengenai penderma jantung itu, Dr Yahya berkata IJN menyampaikan takziah kepada keluarga beliau dan berharap anggota keluarganya sedar tindakan mulianya menyelamatkan satu lagi nyawa.

Terdapat lebih kurang 20,000 pesakit jantung di negara ini dan daripada jumlah itu 1,000 daripada mereka memerlukan pemindahan jantung. Lebih kurang 7,000 orang telah menjanjikan jantung dan buah pinggang mereka. --

BERNAMA
NHD PR